

### **Hauptzach rüschtig:**

Der Pilatus  
isch au nüm der Jüngscht,  
aber är isch no rüschtig,  
überall unterwägs.  
Golfspielä haltet fit,  
persische Golf, Saudi-Arabie,  
Emirat und Tat,  
vo Stans bis Kasachstans,  
für der Pilatus ka Sach,  
Hauptzach: rüschtig.

D' Saudis sind halt e chli Rowdies,  
und mängsmol tötelet `s halt e chli.  
Jemä, Jemerlinei.  
Das isch halt so, weme rüschtig isch.

Rüschtig bringt Jöbs für vili,  
und macht au, dass vili bald kei Jöbs meh bruuche.  
Sone Job isch halt knallhart,  
und sicher ka Schoggijob.  
Zum Glück isch der Pilatus no rüschtig gnueg  
mit em perversische Golfschleger,  
Hauptzach, är wäscht sich nochhär d' Händ, der Pilatus.

Em Saudi isch es au voll egal, ob  
das jetzt Chriegsmaterial isch oder nid,  
Hauptzach, är kriegt `s Material.  
`S Business goht au steinigi Wäg,  
wenn `s mues sii, und wird öpper gsteiniget,  
denn schwigt me lieber,  
und gäge Peitschehieb  
hilft Pilates und Pei Tschii.

Und vo wäge Kashoggi, wahabitteschön!  
Schwyzer Militärschoggi, sit wenn isch das Chriegsmaterial?

Aber für so heikli Geschäft het der Pilatus zum Glück der Ueli.  
Erscht grad isch dä zum echli go Höbelä  
bim Puting und bim Jinping xi,  
Hauptzack Business,  
und är sorgt für's Klima,  
für's Wildweschtmentklima,  
mit enere Saudiänz  
bim Prinz Mohammed bin Salman.  
Mit der Swiss-Wirtschaftsuelitä  
mit em Uelikopter  
echli go chille bim Prinz Killman,  
Gsetz hin oder här, Hauptzack Uusfüerigsbestimmige,  
und was me denn usfühert,  
do chunnt`s nit so druf aa  
bim Ueli, bim Pilatus und bim Salman.  
Hauptzack fit for business,  
und noch jedem Deal:  
Händwäsche mit Kleenex-Flüssig,  
wäsch for cash,  
god seif de Prinz,  
god seif Ueli,  
Stützliländ gwinnschallah,  
Hauptzack rüschtig.

Ch.B. 31.1.2020